



**ODA E AVOKATËVE TË KOSOVËS
ADVOKATSKA KOMORA KOSOVA
KOSOVA BAR ASSOCIATION**

Në bazë të nenit 41 par. 3 pika 3.4, lidhur me nenin 42 par. 2 të Ligjit për Avokatinë Nr. 04/L-193 (Gazeta Zyrtare e Republikës së Kosovës Nr. 20/31 maj 2013), Kuvendi i Odës së Avokatëve të Kosovës në mbledhjen e mbajtur me datë 16 nëntor 2013, aprovon këtë,

**STATUT
TË ODËS SË AVOKATËVE TË KOSOVËS**

I. DISPOZITAT E PËRGJITHSHME

Neni 1

Me këtë Statut rregullohen:

1. Organizimi dhe funksionimi i Odës së Avokatëve të Kosovës (në tekstin e mëtejshëm: OAK),
2. organet, kompetencat, mënyra e formimit dhe e punës së tyre,
3. procedura e marrjes së Licencës për ushtrimin e profesionit të avokatit,
4. të drejtat dhe detyrimet e avokatëve dhe praktikantëve,
5. regjistrimi i anëtarëve vullnetar të OAK,
6. regjistrat përkatës të cilat i udhëheq OAK,
7. zëvendësi i përkohshëm i avokatit dhe përfaqësuesi i autorizuar,
8. organet disiplinore dhe kompetenca e tyre,
9. masat disiplinore dhe suspendimi i përkohshëm për shkeljen e etikës profesionale,
10. degët regjionale të OAK,
11. çështjet tjera të rëndësishme për rregullimin e avokatisë dhe organizimin e OAK.

Neni 2

- 1) OAK është organizatë e pavarur e avokatëve me autorizime publike, e themeluar me ligj.
- 2) Selia e OAK është në Prishtinë.

Neni 3

OAK, në pajtim me Ligjin për Avokatinë, organizon dhe rregullon avokatinë si shërbim të lirë dhe të pavarur.

Neni 4

Anëtarësia e OAK përbëhet nga:

1. Avokatët,
2. Praktikantët, dhe
3. anëtarët vullnetarë.

Neni 5

Detyrat me rëndësi të posaçme të OAK janë:

1. të ruajë pavarësinë e avokatisë dhe të garantojë ushtrimin e lirë dhe të rregullt të veprimtarisë së avokatit,
2. t'i mbikëqyrë avokatët, zyrat e përbashkëta, shoqëritë e avokatëve si dhe format e tjera të lidhjeve të avokatëve për mbrojtjen e të drejtave dhe interesave të palëve,
3. t'i kushtojë kujdes ngritjes së përhershme profesionale të avokatëve dhe praktikantëve përmes programeve të mentorimit të gjeneratave dhe atyre të arsimimit të vazhdueshëm, dhe
4. ta zhvillojë dhe përparojë etikën profesionale dhe të mbikëqyrë respektimin e saj,
5. t'i analizojë dhe studiojë dukuritë e rëndësishme për përparimin dhe mbrojtjen e të drejtave të qytetarëve dhe të personave juridikë,
6. t'i njoftojë organet kompetente mbi gjendjen dhe të përfshihet në aktivitetet për avancimin e të drejtave të njeriut dhe të qytetarit,
7. të kujdeset për kushtet materiale dhe interesat e tjera të avokatëve,
8. të kujdeset për statusin, të drejtat e avokatëve dhe të punësuarve në zyrat e tyre,
9. të organizojë forma të ndryshme të bashkëpunimit me organet e gjyqësorit, organet administrative, me organizatat e profesioneve të tjera të profesionistëve juridik, si dhe me institucionet shkencore, fakultetet juridike dhe organizatat dhe institucionet tjera me programe arsimimi në drejtësi.
10. t'i vë kontaktet për bashkëpunim dhe zhvillim me organizatat, organet, institucionet dhe asociacionet e ndryshme juridike vendore dhe ndërkombëtare.
11. të ketë rol proaktiv në procesin legjislativ, në kuptim të shqyrtimit dhe komentimit të legjislacionit.

Neni 6

Në procedurën për regjistrimin në regjistrat e avokatëve dhe praktikantëve, për përsëritjen e procedurës së regjistrimit si dhe në rastet e tjera kur vendoset mbi të drejtat dhe detyrimet e avokatëve, praktikantëve dhe shoqërive të avokatëve, nëse me Ligjin për Avokatinë, Statut apo me ndonjë akt tjetër të OAK nuk është përcaktuar ndryshe, zbatohen dispozitat e Ligjit mbi Procedurën Administrative.

II. E DREJTA PËR USHTRIMIN E AVOKATISË

Neni 7

- 1) Fitimi i të drejtës për ushtrimin e profesionit të avokatit përcaktohet me ligj.
- 2) E drejta për regjistrimin në regjistrin e avokatëve fitohet me licencim në OAK.

Neni 8

- 1) Kandidati, i cili ka paraqitur kërkesën për regjistrim në Regjistrin e avokatëve, mund të vijojë Kursin Përgatitor për Avokatë (KPA).

- 2) KPA, organizohet nga Qendra Trajnuese për Avokat (QTA), dhe paraqet një program të aftësimin elementar profesional, të përcaktuar nga QTA dhe të aprovuar nga Këshilli Drejtues.

Neni 9

- 1) Kandidati, i cili ka paraqitur kërkesën për regjistrim në Regjistrin e avokatëve, i nënshtrohet provimit të Etikës për avokat para një Komisioni të veçantë, i cili caktohet nga Këshilli Drejtues.
- 2) Komisioni nga par.1 i këtij neni vepron në bazë të rregullores së veçantë.

Neni 10

Kandidatët të cilët plotësojnë kushtet për regjistrim pas dhënies së betimit, pajisen me Licencën (LA) dhe Kartelën e Avokatit (KA).

Neni 11

Licenca për avokatë (LA), përmban:

1. Republika e Kosovës / Republika Kosovo/Republic of Kosovo
2. mbishkrimin “Oda e Avokatëve të Kosovës/Advokatska Komora Kosova/ Kosova Bar Association,
3. numrin rendor nga Regjistri i avokatëve dhe datën e regjistrimit
4. emrin dhe mbiemrin e avokatit
5. selinë e zyrës së avokatit,
6. vendin dhe datën e lëshimit,
7. vulën e thatë, në të cilën është i gravuar “neni 111 i Kushtetutës së Kosovës”

Kartela e avokatit (KA), përmban:

1. Republika e Kosovës/Republika Kosovo/Republic of Kosovo
2. mbishkrimin “Oda e Avokatëve të Kosovës/Advokatska Komora Kosova/ Kosova Bar Association,
3. numrin rendor nga Regjistri i avokatëve,
4. emërtimin “Avokat” ose “Advokat”,
5. emrin dhe mbiemrin e avokatit,
6. selinë e zyrës së avokatit,
7. fotografinë e avokatit dhe
8. datën e lëshimit dhe skadimit të kartelës,

Neni 12

Vendimin mbi madhësinë dhe formën e kartelës së avokatit e merr Këshilli Drejtues i OAK.

Neni 13

Nëse për çfarëdo arsye bëhet ndryshimi ose dëmtimi i ndonjë shënimi në Kartelë, avokati është i detyruar që menjëherë të kërkojë kartelë të re.

Neni 14

Me rastin e çregjistrimit apo shlyerjes avokati është i detyruar që në afatin prej 15 (pesëmbëdhjetë) ditësh nga pranimi i vendimit të Këshillit Drejtues të OAK, ta kthejë Licencën dhe Kartelën.

Neni 15

Kërkesa për regjistrim në regjistrin e avokatëve i drejtohet Këshillit Drejtues të OAK.

Neni 16

Kërkesës për regjistrim duhet bashkëngjitur dëshmitë mbi plotësimin e kushteve ligjore.

Neni 17

Procedurën deri në marrjen e vendimit e udhëheq Drejtori ekzekutiv i OAK.

Neni 18

- 1) Kundër vendimit të Këshillit drejtues me të cilin është refuzuar Kërkesa për regjistrim, mund të parashtrahet ankesë në afatin prej 15 ditësh nga dita e pranimin të vendimit.
- 2) Ankesa i dërgohet Komisionit të Kuvendit për ankesa, i cili vendos për ankesën në afatin prej 30 ditësh, nga dita e pranimin të ankesës.

Neni 19

Procedura e regjistrimit në Regjistrin e avokatëve e filluar sipas kërkesës ndërpritet nëse vërtetohet se ndaj parashtruesit të kërkesës ka filluar ndonjë procedurë hetimore për veprë penale që e bënë të padenjë për ushtrimin e veprimtarisë së avokatit.

III. PRAKTIKANTËT

Neni 20

E drejta për kryerjen e praktikës në zyrën e avokatisë fitohet me regjistrimin në Regjistrin e praktikantit.

Neni 21

Lidhur me kërkesën për regjistrim vendos Këshilli Drejtues i OAK.

Neni 22

Kërkesës i bashkëngjiten dëshmitë mbi plotësimin e kushteve të parapara për regjistrim, nga neni 23 par. 1 i Ligjit për Avokatinë.

Neni 23

Avokati është i detyruar ta udhëheqë praktikantin në aftësimin profesional në të gjitha lëmit juridike.

Neni 24

Dispozitat e këtij Statuti dhe të Kodit të Etikës Profesionale të avokatit të cilat i referohen të drejtave dhe detyrimeve të avokatëve, zbatohen edhe për praktikantin.

Neni 25

- 1) Praktikanti mund ta ndërrojë zyrën e avokatit në të cilën punon.
- 2) Për këtë ndërrim, praktikanti është i obliguar ta njoftojë OAK në afatin prej 8 dite.
- 3) Njoftimit duhet t'i bashkëngjitet vërtetimi i avokatit të cilin e ka ndërpre punën si dhe vërtetimi i avokatit të cilin e vazhdon punën.

Neni 26

Praktikantit të cilit i është ndërprerë puna për arsye të ndryshme ligjore mund ta fillojë procedurën e re të regjistrimit pasi kanë kaluar arsyet e ndërprerjes.

Neni 27

Vendimin për ndërprerjen e punës së praktikantit në zyrën e avokatit e merr Kryetari i OAK. Kundër këtij vendimi mund të ushtrohet ankesë Këshillit drejtues të OAK në afatin prej 8 ditësh nga dita e marrjes së vendimit.

Neni 28

- 1) Kryetari i OAK e pezullon veprimtarinë e praktikantit me vendim të posaçëm, gjersa i njëjti gjendet në paraburgim.
- 2) Kryetari i OAK mund t'ia ndalojë punën, praktikantit, me vendim të posaçëm, nëse është iniciuar procedurë disiplinore kundër tij, për veprat të cilat e bëjnë të padenjë për ushtrimin e veprimtarisë së praktikantit.

Neni 29

Dispozitat lidhur me regjistrimin, të drejtën në ankesë dhe vendosjen lidhur me ankesën e avokatit, përshtatshëm zbatohen edhe kur është fjala për praktikantin.

IV. ANËTARËT VULLNETARË

Neni 30

Statusi i anëtarit vullnetarë, fitohet me regjistrimin në Regjistrin e anëtarëve vullnetarë të OAK.

Neni 31

Procedura e regjistrimit të anëtarëve vullnetarë, të drejtat dhe detyrimet e tyre përcaktohen me rregullore të veçantë.

V. REGJISTRAT E OAK

Neni 32

- OAK i mban këta regjistra:
1. Regjistrin e avokatëve,

2. Regjistrin e praktikantëve,
3. Regjistrin e zyrave të përbashkëta të avokatisë,
4. Regjistrin e shoqërive të avokatëve,
5. Regjistrin mbi bashkëpunimin ndërmjet zyrave të avokatëve
6. Regjistrat e avokatëve të huaj
7. Regjistrin e anëtarëve vullnetarë.
8. Regjistrin e personave që ofrojnë këshilla juridike sipas nenit 10 par. 3 të Ligjit për Avokatinë

Neni 33

- 1) Regjistrat nga neni paraparak janë libra të lidhur.
- 2) Faqet e këtyre librave shënohen me numra rendorë.

Neni 34

Secilin regjistër e vërteton Kryetari i OAK duke e shënuar në pjesën e lartë të faqes së parë, numrin e përgjithshëm të faqeve dhe datën e vërtetimit, nënshkrimin e tij dhe vulën e OAK.

Neni 35

- 1) Mënyrën e udhëheqjes dhe të plotësimit të regjistrave e përcakton me vendim të posaçëm Këshilli Drejtues.
- 2) Regjistrat mund të mbahen edhe në formë elektronike.

Neni 36

Në Regjistrin e avokatëve shënohet:

1. emri dhe mbiemri i avokatit,
2. numri i tij personal,
3. data dhe vendi i lindjes,
4. data e regjistrimit,
5. numri dhe data e vendimit mbi regjistrimin në OAK,
6. data e dhënies së betimit solemn,
7. selia e zyrës,
8. statusi i avokatit në shoqërinë e avokatëve,
9. anëtarësia në zyrën e përbashkët,
10. numrat dhe datat e vendimeve me të cilat janë themeluar ndryshimet në punën e avokatit,
11. data dhe arsyeja e fshirjes së emrit të avokatit nga regjistri së bashku me numrin dhe datën e vendimit,
12. emri dhe mbiemri i avokatit, numri dhe data e vendimit,
13. shënimi mbi fillimin e procedurës disiplinore së bashku me numrin dhe datën e vendimit,
14. shënimet mbi fillimin e procedurës disiplinore së bashku me të gjitha elementet e asaj procedure, dhe
15. shënimet mbi anëtarësimin në organet e OAK si dhe kohëzgjatja e tyre.

Neni 37

Në regjistrin e praktikantëve shënohet;

1. emri dhe mbiemri i praktikantit,
2. numri i tij personal,

- 3.data dhe vendi i lindjes,
- 4.data e regjistrimit si dhe numri dhe data e vendimit,
- 5.shënimet mbi zyrën e avokatit ku punon praktikanti,
- 6.kohëzgjatja e stazhit të praktikantit,
- 7.shënimet mbi vendimet për ndryshimet në punën e praktikantit,
- 8.data dhe arsyeja e fshirjes së praktikantit nga regjistri së bashku me numrin dhe datën e vendimit dhe
- 9.shënimet mbi fillimin e përsëritjes së procedurës të regjistrimit, të fillimit të procedurës disiplinore së bashku me numrat dhe datat e vendimeve.

Neni 38

Në regjistrin e zyrave të përbashkëta shënohen:

1. emri dhe mbiemri i avokatëve,
2. numri me të cilin janë evidentuar avokatet në regjistrin e avokatëve,
3. numri me të cilin është shënuar zyra e përbashkët në regjistrin e zyrave të përbashkëta të avokatisë, dhe
4. data dhe numri i vendimit mbi regjistrimin.

Neni 39

Në regjistrin e shoqërive të avokatëve shënohen:

1. emërtimi i shoqërisë së avokatëve që duhet të përmbajë mbiemrin e së paku njërit prej anëtarëve të shoqërisë dhe parashtesën apo prapashtesën përkatëse sipas tipit të shoqërisë të themeluar në pajtim me Ligjin për Shoqëritë Tregtare,
2. emrat e avokatëve, anëtarë të shoqërisë;
3. specializimi i shoqërisë për degë të caktuara të drejtësisë, nëse ka një të tillë;
4. adresën e selisë së shoqërisë;
5. numrat e telefonave dhe faksit;
6. adresën elektronike;
7. adresa e ueb faqes, nëse ka të tillë.

Neni 40

Mënyrën e udhëheqjes dhe plotësimit të regjistrit të zyrave të përbashkëta dhe të regjistrit të shoqërive së avokatëve me vendim të posaçëm e përcakton Këshilli Drejtues i OAK.

Neni 41

Regjistri për bashkëpunimin e zyrave të avokatëve përmban:

1. shënimet për zyrat e avokatëve të cilët e kanë lidhur kontratën,
2. vendin dhe datën e lidhjes së kontratës së bashku me shënimet mbi plotësimet dhe ndryshimet e mëvonshme,
3. shënimin e shkurtër mbi përmbajtjen dhe formën e bashkëpunimit, dhe
4. datën e regjistrimit, datën dhe numrin e vendimit.

Neni 42

Në Regjistrin e avokatëve të huaj shënohen të dhënat e njëjta sikurse edhe në regjistrat e avokatëve vendor, si dhe:

1. të dhënat lidhur me regjistrimin nga autoriteti përkatës i vendit ku është i licencuar avokati,
2. të dhënat lidhur me Provimin e përputhshmërisë (PP).

Neni 43

Në regjistrin e anëtarësisë vullnetare shënohen:

1. emri dhe mbiemri i anëtarit vullnetarë,
2. numri i tij personal,
3. data dhe vendi i lindjes,
4. numri dhe data e vendimit për regjistrim.

Neni 44

Ne regjistrin e personave që ofrojnë këshilla juridike sipas nenit 10 par. 3 të Ligjit për Avokatinë shënohen:

1. emri dhe mbiemri i personit që ofron këshillë juridike,
2. numri i tij personal,
3. data dhe vendi i lindjes,
4. shënime për punësimin si profesorë ordinar, inordinar i lëndëve juridike në fakultetet e Republikës së Kosovës
5. gradat shkencore të fituara,
6. shënimet mbi vendimet për ndryshimet në punën e praktikantit
7. numri dhe data e vendimit për regjistrim.

VI. TË DREJTAT DHE DETYRAT E AVOKATËVE

Neni 45

- 1) Avokati ka të drejtë të zgjedhë dhe të jetë i zgjedhur në organet e OAK.
- 2) Me akt të veçantë normativ duhet të përcaktohen mekanizma që sigurojnë mundësi për kandidaturën e secilit anëtar për organet e OAK.
- 3) Akti i këtillë përcakton procedurat kandidatures dhe zgjedhjes që do të mbështeten në kritere objektive për secilin anëtar që pretendon zgjedhjen.

Neni 46

Avokatët që zgjidhen në organet e OAK kanë për detyrë të marrin pjesë në aktivitetet e këtyre organeve.

Neni 47

- 1) Në rast kur, për shkak të sëmundjes apo mungesës, avokati nuk është në gjendje që ta ushtrojë veprimtarinë për më tepër se 6 muaj pandërprerë, është i detyruar ta caktojë zëvendësin nga radhët e avokatëve.
- 2) Marrëdhëniet e ndërsjella, rregullohen me kontratë të veçantë.

Neni 48

- 1) Për caktimin e zëvendësit nga neni paraprak, avokati e lajmëron OAK.

- 2) Nëse avokati nuk e cakton zëvendësin, atëherë OAK ia cakton zëvendësin e përkohshëm në zyrën e tij.

Neni 49

Në shoqëritë e avokatëve dhe në zyrat e përbashkëta të avokatëve, avokatin i cili mungon e zëvendësojnë avokatet e tjerë nga shoqëria apo zyra, në mënyrën e përcaktuar me kontratë mbi themelimin e shoqërisë ose të zyrës së përbashkët.

Neni 50

- 1) Avokati është i detyruar ti përmbush të gjitha obligimet financiare të përcaktuara nga organet dhe aktet normative të OAK.
- 2) Në rast të mos pagesës të obligimeve nga paragrafi 1 i këtij neni, në afatin e përcaktuar nga OAK, avokatit në mënyrë automatike i suspendohet licenca për ushtrimin e avokatisë deri në përmbushjen e obligimit financiar.
- 3) Suspendimi i avokatit shpallet në ueb-faqen e OAK dhe për këtë vendim informohen të gjitha institucionet përkatëse.

Neni 51

- 1) Këshilli Drejtues mund të përcaktojë mekanizma për përkrahje, lehtësira, ose ngarkesa për grupe të caktuara të avokatëve, bazuar në vitet e ushtrimit të profesionit (avokatë të ri, avokatë etj.), moshën (avokate doajenë), specifikave etnike (minoritetet), gjinore (femrat), shtrirjes regjionale (vendet rurale).
- 2) Instrumente të veçanta të përkrahjes do të ndërtohen për nxitjen e hyrjes në profesion të pjesëtarëve nga grupet specifike të shoqërisë kosovare (minoritetet, femrat, regjionet rurale).
- 3) Këshilli Drejtues do të nxisë veçanërisht pjesëmarrjen në aktivitetet e OAK të grupeve të caktuara të interesit, përmes formës së angazhimit vullnetar (shoqata nga lëmi i drejtësisë), pjesë të shoqërisë civile, studentë të drejtësisë etj.

Neni 52

- 1) Avokati duhet ta ketë vulën e tij. Në vulë shënohet:

1. emërtimi “AVOKAT” (në gjuhën shqipe), ose “ADVOKAT” (në gjuhë serbe),
2. emri dhe mbiemri i avokatit,
3. numri i licencës,
4. adresa e zyrës.

- 2) Çdo shoqëri e avokatëve apo zyre e përbashkët e avokatëve posedon vulën rrethore dhe katrore, në të cilën shënohen këto të dhëna:

1. emërtimi i shoqërisë apo zyrës së përbashkët me shkurtesën siç parashihet në Ligjin për Shoqëritë Tregtare,

2. adresa e zyrës,
3. emërtimi “AVOKAT” (në gjuhën shqipe), ose “ADVOKAT” (në gjuhë serbe),
4. numri i licencës.

3) Vula rrethore dhe katrore e avokatit, shoqërisë së avokatëve dhe zyrës së përbashkët të avokatëve ka ngjyrë të kaltër të mbyllët.

4) Vula katrore e avokatit, shoqërisë së avokatëve dhe zyrës së përbashkët të avokatëve të mund të përmbajë edhe titullin akademik, numrin e telefonit, telefaksit, adresen postare, adresën elektronike, ueb faqen.

Neni 53

- 1) Teksti në vulën e zyrës së avokatit duhet të shkruhet në njërën nga gjuhët zyrtare që janë në përdorim në Kosovë.
- 2) Teksti në vulën e zyrës së avokatit mund të shkruhet edhe në gjuhën angleze.

Neni 54

- 1) Pllaka me mbishkrimin e zyrës së avokatit, zyrës së përbashkët dhe shoqërisë së avokatëve duhet të vihet në hyrjen e zyrës.
- 2) Këshilli Drejtues i OAK me akt të veçantë do të përcakton madhësinë, përmbajtjen, dizajnin dhe formën e pllakës me mbishkrimin e zyrës së avokatit dhe rregullat mbi reklamimin e zyrës së avokatit, zyrës së përbashkët dhe shoqërisë së avokatëve.

Neni 55

Për ndërrimin e selisë së zyrës duhet të njoftohet me shkrim Këshilli Drejtues i OAK dhe administrata e OAK.

VII. ZËVENDËSI I PÛRKOHSHËM ZYRTAR DHE PÛRFAQËSUESI I AUTORIZUAR I ZYRËS SË AVOKATISË

Neni 56

- 1) Nëse avokatit i ndalohet ushtrimi i veprimtarisë sipas Ligjit për Avokatinë dhe në bazë të këtij Statuti, OAK do ta caktojë zëvendësin e përkohshëm nga radhët e avokatëve, mundësisht të atyre ku është selia e zyrës.
- 2) Emërimi i zëvendësit të përkohshëm bëhet në të njëjtin vendim me të cilin ndalohet ushtrimi i veprimtarisë.
- 3) Zëvendësi i përkohshëm i ka të gjitha të drejtat dhe detyrimet që i ka pasur avokati të cilin e zëvendëson edhe pa autorizimin e veçantë të palëve.

Neni 57

- 1) Zëvendësi i përkohshëm punon në llogari të avokatit të cilin e zëvendëson dhe ka të drejtë në shpërblim për punën e tij në përputhje me Tarifën e avokatëve.
- 2) Me vendimin me të cilin i kthehet e drejta në punë avokatit, revokohet edhe mandati i zëvendësit të përkohshëm.

Neni 58

Nëse avokatit i ndërpritet e drejta për ushtrimin e veprimtarisë, Këshilli Drejtues emëron përfaqësuesin e autorizuar të zyrës së tij me të njëjtin vendim me të cilin e vërteton se avokatit i ndërpritet ushtrimi i veprimtarisë.

Neni 59

Përfaqësuesi i autorizuar duhet menjëherë, e më së voni në afatin prej 30 (tridhjetë) ditësh, t'i lajmërojë palët se avokatit të mëparshëm i është hequr e drejta për ushtrimin e veprimtarisë dhe t'ua kthejë shkresat e lëndëve të tyre.

Neni 60

I autorizuari është i obliguar që, pa ndonjë autorizim të posaçëm, t'i përfaqësojë interesat urgjente të palëve, në mënyrë korrekte, derisa pala nuk e tërheq lëndën ose nuk e tërheq autorizimin.

Neni 61

- 1) Kur për shkak të vdekjes, pushon ushtrimi i veprimtarisë së avokatit, anëtarët e familjes së ngushtë, kanë të drejtë ta propozojnë përfaqësuesin e autorizuar të zyrës.
- 2) Këshilli Drejtues ka për detyrë ta marrë në shqyrtim një propozim të tillë.

Neni 62

- 1) Pranimi i emërimit si përfaqësues i autorizuar bëhet me marrëveshjen e avokatëve.
- 2) Përfaqësuesi i autorizuar punon në emrin e vet dhe për llogarinë e vet.

Neni 63

Pas përfundimit të punëve nga zyra e ish avokatit, përfaqësuesi i autorizuar ua dorëzon pasardhësve të tij fitimin e pastër, së bashku me shkresat e ndryshme të ish avokatit.

Neni 64

- 1) Përfaqësuesi i autorizuar i kontrakton me ish avokatin ose me pasardhësit e tij kushtet e mbylljes të zyrës.
- 2) Nëse kontrata nuk nënshkruhet në afatin e arsyeshëm, ato kushte do të përcakton kryetari i OAK me vendim të posaçëm.
- 3) Kundër këtij vendimi mund të ushtrohet ankesë Këshillit drejtues në afat prej 15 ditësh nga dita e marrjes së vendimit.

4) Ankesa nuk e ndalon ekzekutimin e vendimit.

Neni 65

Përfaqësuesi i autorizuar është i obliguar që, pas mbylljes të zyrës, t'ia dorëzojë OAK raportin e punës dhe të mbylljes së zyrës.

VIII. ORGANIZIMI I BRENDSHËM I OAK

Neni 66

Organet e OAK janë:

1. Konferenca e përgjithshme
2. Kuvendi
3. Kryetari
4. Këshilli Drejtues
5. Këshilli Mbikëqyrës
6. Organet Disiplinore
7. Komisioni për ankesa,

Neni 67

Mandati i anëtarëve të organeve të OAK zgjat 2 (dy) vjet, me të drejte rizgjedhjeje edhe për një mandat.

1) Konferenca e përgjithshme

Neni 68

- 1) Konferenca e përgjithshme mbledhet një herë në vit dhe në të diskutohen çështjet me interes për avokatinë.
- 2) Konferencën e përgjithshme e përbëjnë të gjithë avokatët aktiv.

2) Kuvendi i OAK

Neni 69

- 1) Kuvendi e zhvillon aktivitetin e vet ne Mbledhje.
- 2) Mbledhja e rregullt e Kuvendit të OAK (në tekstin e mëtejshëm Kuvendi), mbahet një herë në vit.
- 3) Mbledhjen e rregullt të Kuvendit e thërret Kryetari i OAK.

Neni 70

Mbledhjen e jashtëzakonshme të Kuvendit e thërret Kryetari me nismën e vet, në bazë të kërkesës së 1/3 të delegatëve të Kuvendit ose në bazë të kërkesës, së paku, të tri Degëve regjionale të OAK.

Neni 71

- 1) Delegatet e Kuvendit, Degët regjionale të OAK, të cilët kërkojnë mbledhjen e jashtëzakonshme të Kuvendit, kërkesën me shkrim duhet t'ia dorëzojnë Kryetarit me propozimin e rendit të ditës.
- 2) Kryetari e thërret mbledhjen e jashtëzakonshme të Kuvendit të OAK, më së voni, në afatin prej 2 (dy) muajsh nga dita e marrjes së kërkesës nga par. 1 i këtij neni.

Neni 72

- 1) Thirrja për mbledhjen e rregullt ose të jashtëzakonshme të Kuvendit, si dhe të gjitha materialet përcjellëse, duhet t'i dërgohet secilit anëtar, më së voni, 15 ditë para mbajtjes së saj.
- 2) Në thirrje duhet të ceket vendi dhe koha e mbajtjes së Kuvendit.

Neni 73

- 1) Mbledhja e Kuvendit mund të mbahet dhe të merren vendimet e plotfuqishme nëse në mbledhje merr pjesë shumica e delegatëve.
- 2) Kuvendi merr vendime me shumicë të thjeshtë votash të delegatëve të pranishëm në mbledhje.

Neni 74

- 1) Mbledhja e Kuvendit mund të zhvillojë punimet në sesione dhe seancën plenare. Vendimet e Kuvendit merren në seancën plenare.
- 2) Me rregulloren për punën e Kuvendit mund të parashihen sesionet disa ditore të Mbledhjes së Kuvendit.

Neni 75

Kompetencat e Kuvendit janë:

1. Zgjedhja e Kryetarit dhe zëvendësit të tij,
2. Zgjedhja e Komisioneve Disiplinore,
3. Zgjedhja e Komisionit mbikëqyrës,
4. Miratimi i Kodit të Etikës Profesionale, Statutit të Odës së Avokatëve, Tarifës për kompensimin e Avokatëve, Rregullores disiplinore, Rregullores për punën e Kuvendit dhe Rregullores për Arsimimin e Vazhdueshëm Ligjor të Obligueshëm të avokatëve,
5. Miratimi i buxhetit të Odës,
6. Miratimi i raportit vjetor,
7. Vendime mbi çështjet e tjera, të rezervuara me Statutin e Odës së Avokatëve.
8. Shqyrtimi i të gjitha çështjeve që kanë të bëjnë me kryerjen e veprimtarisë së avokatisë dhe pozitën e avokatisë,
9. Shqyrtimi i raportit të organit mbikëqyrës,
10. Debatimi dhe nxjerrja e qëndrimeve dhe vendimeve lidhur me përparimin e punës së OAK, bashkëpunimin dhe anëtarësinë me institucione dhe asociacione tjera vendore dhe ndërkombëtare,

11. Shqyrtimi dhe marrja e qëndrimeve mbi të gjitha çështjet nga fushëveprimi i organeve të tjera të OAK.

Neni 76

Punimet e Kuvendit zhvillohen sipas Rregullores së punës të Kuvendit.

3) Kryetari i OAK

Neni 77

Kompetencat e Kryetarit të OAK janë:

1. drejton dhe udhëheq OAK,
2. përfaqëson OAK,
3. udhëheq procedurën e dhënies së betimit solemn,
4. i lejon pagesat nga arka e OAK deri në limitin e caktuar nga Këshilli Drejtues dhe vendos për shpenzimin e tyre,
5. mbikëqyrë punën e Drejtorit Ekzekutiv,
6. kryen punë të tjera në pajtim me Ligjin për Avokatinë, këtë Statut dhe aktet tjera normative, duke ndërlidh aktivitetet ditore të OAK ashtu si është e përcaktuar me ligj.

Neni 78

Për punën e vet Kryetari i përgjigjet Kuvendit të OAK.

Neni 79

- 1) Kryetarin, që për shkaqe objektive nuk mund një kohë të caktuar ta ushtrojë detyrën, e zëvendëson Zëvendës Kryetari.
- 2) Zëvendës Kryetari nuk mund ta ushtroj detyrën e kryetarit për një periudhë më të gjatë se 6 muaj.

Neni 80

- 1) Kryetari dhe Zëvendës Kryetari në rastet kur e zëvendëson atë, për punën e vet ka të drejte në shpërblim.
- 2) Lartësia e shpërblimit nga par.1 i këtij neni caktohet nga Këshilli Drejtues.

Neni 81

- 1) Mandati i Kryetarit dhe Zëvendës Kryetarit pushon;
 1. me dorëheqje,
 2. me shkarkim,
 3. kur me tepër se 6 muaj pandërprerë nuk është në gjendje ta ushtroj detyrën.
- 2) Për procedurën e shkarkimit zbatohen përshtatshmërisht dispozitat e këtij Statuti lidhur me thirrjen dhe vendimmarrjen në mbledhjet e Kuvendit.

4) Këshilli Drejtues i OAK

Neni 82

- 1) Këshilli Drejtues i OAK, përbëhet nga Kryetari i OAK, kryetari i mëparshëm i OAK, Zëvendës Kryetari, 7 (shtatë) anëtarë - Kryetar të Degëve Regjionale si dhe 1 (një) anëtar jashtë OAK.
- 2) Anëtarë i Këshillit Drejtues jashtë OAK do të emërohet personi që është i shquar në lëminë juridike.

Neni 83

Kompetencat e Këshillit Drejtues janë:

1. përcakton propozimin e akteve normative në kompetencë të Kuvendit për miratim, sipas nenit 75 të Statutit,
2. miraton akte normative përveç atyre të parashikuara me paragrafin 1 të këtij neni,
3. vendos për lartësinë e shumës për regjistrim, lartësinë e anëtarësisë dhe lartësinë e shumës së të hollave për obligimet tjera të avokatëve, praktikantëve dhe anëtarëve vullnetarë,
4. vendos për shumën e të hollave me të cilat mund të disponojë Këshilli Drejtues dhe Kryetari i OAK,
5. vendos për programin dhe rekomandimet për ngritjen profesionale të avokatëve dhe praktikanteve,
6. vendos dhe jep rekomandime dhe propozime të interesit të përgjithshëm për ushtrimin e avokatisë,
7. përcakton propozimin e buxhetit, llogarisë dhe bilancit të OAK dhe ia paraqet Kuvendit për miratim,
8. udhëheq afarizmin financiar të OAK,
9. përcakton propozimin e raportit mbi punën e Këshillit dhe të Kryetarit të OAK,
10. përgatit raportet për anëtarësimin e OAK në shoqata ndërkombëtare të avokatëve dhe organizatat e tjera dhe i cakton përfaqësuesit e OAK në ato asociacione,
11. kujdeset për përparimin e bashkëpunimit të OAK në vendet e tjera dhe me asociacione të tjera profesionale,
12. përcjell punën e avokatëve, zyrave të përbashkëta, shoqërive të avokatëve dhe praktikanteve si dhe ndërmerr veprime për përparimin e punës së tyre,
13. kryen punë me rëndësi të përgjithshme të OAK,
14. organizon takime pune, tryeza të rrumbullakëta etj.,
15. mbikëqyr publikimin e Buletinit të OAK dhe botimeve tjera,
16. kryen të gjitha punët e përcaktuara me Ligjin për Avokatinë, me këtë Statut dhe akte të tjera të përgjithshme,
17. këshillon dhe njofton anëtarët e OAK për çështjet e detyrimeve profesionale,
18. vendosë mbi kërkesat për anëtarësinë në OAK dhe ankesat kundër saj,
19. ndërmjetëson në mospajtimet ndërmjet anëtarëve të OAK,
20. mbikëqyrë përmbushjen e detyrimeve që i takojnë anëtarëve të OAK dhe përmbaron vendimet e Komisionit Disiplinor,
21. kërkon fillimin e procedurës disiplinore, në qoftë se kjo procedurë nuk është iniciuar nga palët e autorizuara,
22. administron me buxhetin e OAK,
23. jep llogari vjetore Kuvendit të OAK për administrimin e OAK,
24. përgatit ekspertiza, të kërkuara nga organet zyrtare ose ndonjë gjykatë,
25. kontribuon në shkollimin dhe testimin e studentëve dhe praktikantëve,
26. bën propozimin për anëtarin e komisionit për provim të jurisprudencës,

27. përgatit raportin vjetor Kuvendit të Kosovës, për punën e OAK,
28. kryen detyrat e ngarkuara nga Kuvendi i OAK të parashikuara me Statutin e OAK.

Neni 84

- 1) Mbledhja e Këshillit Drejtues mund të mbahet dhe të merren vendimet e plotfuqishme nëse në mbledhje merr pjesë shumica e anëtarëve.
- 2) Këshilli Drejtues merr vendime me shumicë të thjeshtë votash të anëtarëve të pranishëm.
- 3) Në mungesë të Kryetarit mbledhjet i udhëheq zëvendësi i tij.

Neni 85

Kryetari i OAK e thërret mbledhjen e jashtëzakonshme të Këshillit Drejtues, nëse këtë e kërkon, së paku, 1/3 e anëtarëve të tij.

Neni 86

- 1) Thirrjet dhe materialet për mbledhjet e Këshillit Drejtues u dorëzohen anëtarëve, më së voni 8 ditë para mbledhjes.
- 2) Në thirrje duhet të shënohet vendi dhe koha e mbajtjes së mbledhjes dhe rendi i ditës.

Neni 87

Në mbledhje mbahet procesverbali të cilin e nënshkruajnë Kryesuesi i mbledhjes dhe procesmbajtësi.

5) Këshilli mbikëqyrës

Neni 88

- 1) Anëtarët e Këshillit mbikëqyrës emërohen nga Kuvendi i OAK.
- 2) Këshilli mbikëqyrës përbehet nga 5 anëtarë. Kryetari i Këshillit mbikëqyrës zgjidhet nga vetë anëtarët e Këshillit.

Neni 89

- 1) Sipas propozimit të Këshillit Drejtues apo 1/3 e anëtarëve të Kuvendit, Kuvendi ka të drejtë ta shkarkojë secilin anëtar të Këshillit mbikëqyrës, edhe para skadimit të mandatit, nëse vërtetohet se nuk e ka kryer detyrën në mënyrë korrekte dhe profesionale.
- 2) Vendimi i Kuvendit është përfundimtar.

Neni 90

- 1) Këshilli mbikëqyrës është i obliguar që së paku 1 (një) herë në vit ta kontrollojë afarizmin financiar të OAK.
- 2) Mbi punën e kryer, Këshilli mbikëqyrës e përpilon raportin të cilin ia dorëzon Kuvendit të OAK në miratim.

Neni 91

Organet e OAK që e udhëheqin afarizmin financiar të OAK (Këshilli Drejtues dhe Kryetari i OAK), janë të obliguar t'i prezantojnë të gjitha shënimet Këshillit mbikëqyrës, të cilat ata i kërkojnë.

6) Organet Disiplinore

Neni 92

- 1) Procedura disiplinore zhvillohet nga organet disiplinore të OAK.
- 2) Organet disiplinore përbëhen nga:
 1. Zyra e Prokurorit Disiplinor
 2. Komisioni Disiplinor
 3. Komisioni për Ankesa
- 3) Veprimet e organeve disiplinore rregullohen me akt të veçantë.

Neni 93

- 1) Zyra e Prokurorit Disiplinor inicion, pranon dhe shqyrton çdo fletëparaqitje ndaj avokatëve dhe praktikantëve.
- 2) Prokurori Disiplinor zgjidhet nga Këshilli Drejtues.
- 3) Gjatë punës, Zyra e Prokurorit Disiplinor është e pavarur në zhvillimin e procedurës së hetimit sipas Ligjit për Avokatinë, Statutit të OAK, Kodit të Etikës profesionale të Avokatëve dhe Rregullores Disiplinore të OAK.
- 4) Përbërja e Zyrës së Prokurorit Disiplinor dhe procedura e përzgjedhjes përcaktohen me akt të veçantë.

Neni 94

Komisioni disiplinor përbëhet nga 5 anëtarë të cilët zgjidhen nga Kuvendi i OAK. Anëtarët kanë zëvendësit e tyre.

Neni 95

Komisionet disiplinore zgjedhin nga radhët e veta Kryetarin e Komisionit që udhëheq punën e Komisionit.

Neni 96

- 1) Gjatë punës, anëtarët e komisionit disiplinor janë të pavarur dhe vendosin sipas Ligjit, Statutit të OAK, Kodit të Etikës profesionale të Avokatëve dhe Rregullores Disiplinore të OAK.
- 2) Sipas propozimit të Këshillit Drejtues apo 1/3 e anëtarëve të Kuvendit, Kuvendi ka të drejtë ta shkarkojë secilin anëtar të Komisionit Disiplinor, edhe para skadimit të mandatit, nëse vërtetohet se nuk e ka kryer detyrën në mënyrë korrekte dhe profesionale.

3) Vendimi i Kuvendit është përfundimtar.

7) Komisioni për ankesa

Neni 97

- 1) Anëtarët e Komisionit për ankesa emërohen nga Kuvendi i OAK.
- 2) Komisioni përbëhet prej 5 (pesë) anëtarësh. Anëtarët kanë zëvendësit e tyre.
- 3) Kryetari i Komisionit për ankesa zgjidhet nga vetë anëtarët e Komisionit.

Neni 98

- 1) Komisioni për ankesa, në cilësinë e organit të shkallës së dytë, vendos lidhur me ankesat që parashtrihen kundër vendimeve të Këshillit drejtues, si dhe ankesat disiplinore.
- 2) Kur Komisioni për ankesa vendos sipas ankesave disiplinore është i detyruar që ti përmbahet rregullave të veçanta të kësaj procedure.
- 3) Sipas propozimit të Këshillit Drejtues apo 1/3 e anëtarëve të Kuvendit, Kuvendi ka të drejtë ta shkarkojë secilin anëtar të Komisionit për ankesa, edhe para skadimit të mandatit, nëse vërtetohet se nuk e ka kryer detyrën në mënyrë korrekte dhe profesionale.
- 4) Vendimi i Kuvendit është përfundimtar.

Neni 99

- 1) Komisioni për ankesa është i obliguar që për ankesat të vendosë në afatin prej 30 (tridhjetë) ditësh nga dita e parashtrimit të ankesës.
- 2) Kundër vendimit të Komisionit për ankesa mund të fillohet kontesti administrativ në përputhje me nenin 55 të Ligjit për Avokatinë.

Neni 100

Komisioni për ankesa punon dhe merr vendime të plotfuqishme, kur në mbledhje janë të pranishëm shumica e anëtarëve.

IX. SHTRIRJA REGJIONALE E OAK

Neni 101

Degët regjionale janë forma të organizimit dhe aktivitetit territorial të OAK.

Neni 102

Anëtarë të Degëve regjionale janë të gjithë avokatët, të cilët selinë e zyrave e kanë në atë regjion.

Neni 103

Dega regjionale ka Kryetarin, Zëvendës Kryetarin dhe Sekretarin.

Neni 104

Organizimi i Degëve regjionale, detyrat dhe aktivitetet e tyre rregullohen me akt të veçantë.

X. PËRGJEGJËSIA DISIPLINORE E AVOKATËVE DHE E PRAKTIKANTËVE

1) Llojet e shkeljeve dhe masave disiplinore

Neni 105

Për shkeljet e detyrave dhe të autoritetit të avokatisë, avokatët dhe praktikantët përgjigjen në bazë të dispozitave ligjore, Statutit të OAK dhe Kodit të Etikës Profesionale të Avokatëve.

Neni 106

Shkelja e rëndë e detyrave dhe e autoritetit të avokatisë ekziston:

1. nëse pas regjistrimit konstatohet se avokati, në momentin e regjistrimit, nuk i ka plotësuar kushtet ligjore të parapara për regjistrim,
2. në rastet kur avokati shpallet fajtor me aktgjykim të formës së prerë për një çështje penale, e cila e vë në dyshim dinjitetin e tij për ushtrimin e mëtejshëm të veprimtarisë së avokatit,
3. nëse e ushtron punën e avokatit në mënyrë të pandërgjegjshme,
4. nëse në mënyrë të pandërgjegjshme i kryen punët në rastet e përfaqësimit të autorizuar të zyrës së avokatit tjetër,
5. nëse e shkel obligimin e ruajtjes së sekretit të avokatisë, përveç rasteve të parashikuara me Kapitullin II të Kodit të Etikës Profesionale për Avokatë,
6. nëse merr shpërblim më të madh se sa është përcaktuar me tarifë apo me marrëveshje të lirë,
7. nëse në mënyrë të pandërgjegjshme e udhëheq afarizmin e palës si dhe tenton të mos paguajë ose nuk ia paguan paratë që i ka marrë për llogarinë e tij,
8. nëse në ankandin publik, në kundërshtim me interesin e palës që e përfaqëson, ia mundëson vetës, të afërme ose personave të tretë blerjen e lëndës së ankandit,
9. nëse i shkel rëndë obligimet ndaj praktikantit që punon tek ai,
10. nëse kërkon klientët në mënyrë të padenjë, përmes personit të tretë dhe në mënyra të tjera,
11. nëse kërkon shpërblim nga pala kinse në llogari të gjyqtarit, prokurorit apo ndonjë organi tjetër gjyqësor, apo personelit në administratën shtetërore,
12. nëse në kundërshtim me dispozitat ligjore dhe të këtij Statuti mban zyrë tjetër jashtë selisë së zyrës së vet ose nëse themelon marrëdhënie të rregullt pune jashtë avokatisë,
13. nëse, në çfarëdo mënyre e keqpërdor besimin dhe autorizimin e palës që e përfaqëson,
14. nëse nuk i përmbush obligimet materiale ndaj OAK që rrjedhin nga anëtarësia në Odën e Avokatëve,
15. Nëse nuk përmbush vendimet e organeve të OAK,
16. nëse në mënyrë të pandërgjegjshme punon dhe i shkel obligimet në organet e OAK,
17. nëse pas kërkesës me shkrim nuk ia dorëzon palës shkresat e lëndës,
18. nëse e ndërron selinë e zyrës në kundërshtim me dispozitat ligjore dhe të këtij Statuti ose nuk e njofton OAK për ndërrimin e selisë së zyrës.

Neni 107

Si shkelje e rëndë e detyrave dhe e autoritetit të avokatisë konsiderohet edhe sjellja dhe veprimet e avokatit në jetën private dhe opinionin publik, nëse me ato veprime dhe sjellje cenohet autoriteti i avokatisë.

Neni 108

Përpos shkeljeve nga neni 105, shkelja e rëndë e detyrave dhe e autoritetit të avokatisë, në punën e praktikantit ekziston:

1. nëse nuk e ushtron praktikën në zyrën e avokatit,
2. nëse i shkel rëndë obligimet e veta ligjore ndaj avokatit tek i cili është duke e kryer stazhin e praktikantit, dhe
3. nëse punët e avokatisë i kryen në mënyrë të pavarur dhe për llogarinë e vet.

Neni 109

Shkeljet e lehta të detyrës dhe të autoritetit të avokatisë janë, po ashtu, shkeljet nga neni 106 të këtij Statuti, por kur mungon pasoja e rëndë si dhe rastet e tjera të mosrespektimit të dispozitave të Kodit të Etikës profesionale të Avokatëve.

Neni 110

Për shkeljet e kryera mund të shqiptohen masat disiplinore të përcaktuara në nenin 51 të Ligjit për Avokatinë.

Neni 111

- 1) Gjyba shqiptohet për shkelje të rënda ose me rastin e përsëritjes së shkeljeve të lehta.
- 2) Lartësia e gjobës mund të jetë deri në €5.000.
- 3) Për shkeljet e rënda minimumi i gjobës mund të jetë prej €500.
- 4) Për shkeljet e lehta minimumi i gjobës mund të jetë prej €200.
- 5) Gjyba arkëtohet në buxhetin e OAK.

Neni 112

- 1) Ndaj avokatit mund të shqiptohet masa e suspendimit të përkohshëm në rastet kur gjykata pas shqyrtimit të dytë të aktakuzës cakton shqyrtimin kryesor në një lëndë penale, e cila e bën të padenjë për ushtrimin e mëtejshëm të veprimtarisë së avokatit.
- 2) Masën nga par. 1 i këtij neni e shqipton Këshilli Drejtues, me propozimin e Zyrës së Prokurorit Disiplinor.
- 3) Avokatit të suspenduar i ndalohet e drejta për ushtrimin e profesionit, deri në përfundimin e procedurës penale në formën e prerë.
- 4) Avokati i suspenduar ka të drejtë gjatë kohëzgjatjes së suspendimit, të kërkojë nga Këshilli Drejtues i OAK të rishqyrtojë masën nga par. 1 i këtij neni, nëse me aktgjykim të shkallës së

parë është shpallur jo fajtor për veprën penale e cila e bën të padenjë për ushtrimin e mëtejshëm të veprimtarisë së avokatit.

- 5) Në vendimin për suspendim Këshilli Drejtues duhet të veproj në përputhje me nenin 17 të Kodit të Procedurës Penale.

Neni 113

- 1) Forma e publikimit të ndëshkimeve disiplinore përcaktohet me akt të veçantë.
- 2) Për çfarëdo forme të suspendimit ose ndalimit të përkohshëm të së drejtës në ushtrimin e avokatisë, njoftohen të gjitha institucionet relevante.

2) Procedura disiplinore

Neni 114

Procedura disiplinore e OAK rregullohet me akt të veçantë.

3) Parashkrimi

Neni 115

Parashkrimi për fillimin e procedurës dhe ekzekutimin e masave parashihet si në nenin 56 të Ligjit për Avokatinë.

XI. BIBLIOTEKA E OAK

Neni 116

- 1) OAK disponon me bibliotekën e vet.
- 2) Të drejtën e shfrytëzimit të bibliotekës e kanë të gjithë avokatët dhe praktikantët, të regjistruar në regjistrat përkatës pranë OAK.
- 3) Nën kushtet e caktuara biblioteka e OAK mund të shfrytëzohet edhe nga grupet që merren me studimet në drejtësi dhe qytetaret e tjerë.

Neni 117

- 1) Këshilli Drejtues e përcakton pagesën në emër të anëtarësisë për ata avokatë ose praktikantë që dëshirojnë ta shfrytëzojnë bibliotekën.
- 2) Shuma e mbledhur e mjeteve përdoret vetëm për pasurimin e fondit të bibliotekës dhe për mirëmbajtjen e saj.

Neni 118

Për bibliotekën kujdeset bibliotekisti, i cili e mban evidencën e titujve, të shfrytëzuesve dhe e arkëton pagesën e anëtarësisë

Neni 119

- 1) Përpos anëtarësisë, financimi dhe pasurimi i fondit të bibliotekës bëhet edhe në mënyra të tjera.
- 2) Vendimin mbi këtë e merr Kryetari i OAK.

XII. SPECIALIZIMI I AVOKATËVE

Neni 120

Avokati që plotëson kushtet ligjore, kushtet nga ky Statut dhe kushtet nga aktet e veçanta të OAK, ka të drejtë ta paraqesë kërkesën për t'iu pranuar titulli i specialistit në degën e caktuar të drejtësisë (neni 48 i Ligjit për Avokatinë).

Neni 121

Titulli i specialistit pranohet nga këto degë:

1. E drejta kushtetuese,
2. E drejta penale,
3. E drejta civile,
4. E drejta administrative,
5. E drejta e punës,
6. E drejta komerciale
7. E drejta bankiere,
8. E drejta e autorit, pronësia intelektuale
9. E drejta ndërkombëtare
10. Drejtësia për te mitur

Neni 122

Kërkesa për pranimin e titullit të specialistit i drejtohet Këshillit drejtues të OAK.

Neni 123

Kushtet dhe procedurën për specializim e përcakton Këshilli Drejtues i OAK me akt të veçantë.

XIII. PUBLIKIMI I BULETINIT

Neni 124

- 1) OAK e nxjerr buletin, si reviste e shkrimit juridik.
- 2) Buletini publikohet së paku çdo 6 (gjashtë) muaj.

Neni 125

Anëtarët e redaksisë, redaktorin dhe kryeredaktorin e Buletinit e emëron Këshilli Drejtues i OAK.

Neni 126

Anëtarët e redaksisë i përgjigjen për punën e vet Këshillit Drejtues, i cili ka të drejtë ta shkarkojë secilin anëtar edhe para skadimit të mandatit.

Neni 127

- 1) OAK boton edhe publikime të tjera me qëllim të informimit të anëtarësisë për aktivitetet e organeve.
- 2) Përveç kësaj, OAK boton edhe publikime te veçanta.

XIV. AFARIZMI FINANCIAR

Neni 128

- 1) Afarizmi financiar i OAK zhvillohet sipas para-llogarisë vjetore mbi të hyrat dhe shpenzimet, të cilën e miraton Kuvendi.
- 2) Afarizmi financiar dhe procedurat të cilat ndërlidhën me to rregullohen me Rregulloren financiare të OAK.

Neni 129

Të hyrat e rregullta vjetore të OAK janë:

1. Të hyrat nga regjistrimi i avokatëve
2. të hyrat nga anëtarësia e avokatëve
3. të hyrat nga pulla e OAK, dhe
4. të hyrat nga donacionet, dhuratat, e tjera.

Neni 130

Përveç të hyrave të rregullta, OAK disponon edhe me të hyra të jashtëzakonshme:

1. pagesa e gjobave nga procedurat disiplinore apo procedurat tjerat dhe
2. të hyrat e ndryshme të jashtëzakonshme.

Neni 131

OAK i përdor mjetet financiare për realizimin e detyrave dhe objektivave të veta të përcaktuara me Ligjin për Avokatinë dhe me këtë Statut.

Neni 132

- 1) Veprimtaria financiare i nënshtrohet auditimit të brendshëm se paku një (1) herë në vit dhe auditimit të jashtëm të pavarur çdo vit kalendarik.
- 2) Bilancin mbi afarizmin financiar e miraton Kuvendi i OAK.
- 3) Bilancin e nënshkruan Kryetari i OAK.

XV. SHENJA DHE VULAT E OAK

Neni 133

OAK e ka shenjën e vet të cilën e përcakton Kuvendi.

Neni 134

Vulat e OAK janë në formë të rumbullakët dhe në formë katrori me mbishkrimin:

Republika e Kosovës/ Republika Kosovo/Republic of Kosovo

ODA E AVOKATËVE TË KOSOVËS

ADVOKATSKA KOMORA KOSOVA

KOSOVA BAR ASSOCIATION

Vula katrore përmban edhe shenjën e protokollit

“**Nr. Br. No.** _____” dhe “**Dt.** _____”.

Neni 135

Përmbajtja e vulave tjera për nevojat e OAK përcaktohet me vendim të veçantë të Këshillit Drejtues.

Neni 136

Ngjyrat zyrtare në të cilat mund të shtypën vulat janë:

1. e zezë dhe
2. kaltër e mbylltë.

XVI. ADMINISTRATA E OAK

Neni 137

- 1) Për ushtrimin e aktivitetit të vet OAK rekruton stafin.
- 2) Stafi i OAK udhëhiqet dhe mbikëqyret nga Drejtori Ekzekutiv.

Neni 138

Të drejtat dhe detyrimet e stafit administrativ të OAK përcaktohen me rregullore të veçantë.

Neni 139

- 1) Themelimi i vendit të punës në OAK bëhet me vendimin e Këshillit Drejtues.
- 2) Marrëdhënien e punës, punëtorët e themelojnë në bazë të kontratës së punës dhe dispozitave të tjera të parapara në Ligjin e punës në fuqi.

XVII. DISPOZITAT KALIMTARE DHE PËRFUNDIMTARE

Neni 140

Procedurat e filluara pranë organeve të OAK, para hyrjes në fuqi të këtij Statuti, do të vazhdojnë dhe do të përfundojnë në bazë të dispozitave që kanë qenë në fuqi në atë kohë.

Neni 141

Organet e OAK, të zgjedhura sipas dispozitave të Statutit që ka qenë në fuqi para hyrjes në fuqi të këtij Statuti, e vazhdojnë punën deri në skadimin e mandatit të tyre.

Neni 142

Ky Statut hyn në fuqi në ditën e miratimit nga Kuvendi i Odës së Avokatëve të Kosovës dhe zbatohet nga data 01 Janar 2014.

Av. Ibrahim Z. Dobruna
Kryetari i OAK-së